

রেজিস্টার্ড নং ডি এ-১

বাংলাদেশ



গেজেট

অতিরিক্ত সংখ্যা
কর্তৃপক্ষ কর্তৃক প্রকাশিত

রবিবার, এপ্রিল ২, ২০১৭

[বেসরকারি ব্যক্তি এবং কর্পোরেশন কর্তৃক অর্থের বিনিময়ে জারীকৃত বিজ্ঞাপন ও নোটিশসমূহ]

বীমা উন্নয়ন ও নিয়ন্ত্রণ কর্তৃপক্ষ

৩৭/এ, দিলকুশা বা/এ

ঢাকা।

www.idra.org.bd

প্রজ্ঞাপন

তারিখ : ০৭ অগ্রহায়ণ, ১৪২৩ বঙ্গাব্দ/ ২১ নভেম্বর, ২০১৬ খ্রিস্টাব্দ

এস.আর.ও নং ৩৪৬-আইন/২০১৬।—বীমা আইন, ২০১০ (২০১০ সনের ১৩ নং আইন) এর ধারা ১৪৮, ধারা ১৫৬ এর সহিত পঠিতব্য, এ প্রদত্ত ক্ষমতাবলে কর্তৃপক্ষ, সরকারের অনুমোদনক্রমে, নিম্নরূপ প্রবিধানমালা প্রণয়ন করিল, যথা :—

১। শিরোনাম ও প্রবর্তন।—(১) এই প্রবিধানমালা লাইফ ইন্স্যুরেন্স গ্রাহক নিরাপত্তা তহবিল প্রবিধানমালা, ২০১৬ নামে অভিহিত হইবে।

(২) ইহা অবিলম্বে কার্যকর হবে।

২। সংজ্ঞা।—(১) বিষয় বা প্রসঙ্গের পরিপন্থী কিছু না থাকিলে, এই প্রবিধানমালায়—

(ক) “অধিকারভোগী” অর্থ, ক্ষেত্রমত, পলিসি গ্রাহক কর্তৃক মনোনীত ব্যক্তি বা ব্যক্তিগণ বা তাহার উত্তরাধিকারী;

(খ) “কর্তৃপক্ষ” অর্থ বীমা উন্নয়ন ও নিয়ন্ত্রণ কর্তৃপক্ষ আইনের অধীন প্রতিষ্ঠিত বীমা উন্নয়ন ও নিয়ন্ত্রণ কর্তৃপক্ষ;

(৩১২৩)

মূল্য : টাকা ৮.০০

- (গ) “কমিটি” অর্থ প্রবিধান ১১ এর অধীন গঠিত লাইফ ইস্যুরেন্স গ্রাহক নিরাপত্তা তহবিল পরিচালনা কমিটি;
- (ঘ) “তহবিল” অর্থ লাইফ ইস্যুরেন্স গ্রাহক নিরাপত্তা তহবিল;
- (ঙ) “দেউলিয়া বীমাকারী” অর্থ দেউলিয়া ঘোষিত হইয়াছে এমন কোন লাইফ বীমাকারী;
- (চ) “পলিসি গ্রাহক” অর্থ কোন লাইফ বীমাকারীর সহিত লাইফ বীমা চুক্তিতে আবদ্ধ হইয়াছেন এমন কোন ব্যক্তি;
- (ছ) “বীমা আইন” অর্থ বীমা আইন, ২০১০ (২০১০ সনের ১৩ নং আইন);
- (জ) “বীমা কর্তৃপক্ষ আইন” অর্থ বীমা উন্নয়ন ও নিয়ন্ত্রণ কর্তৃপক্ষ আইন, ২০১০ (২০১০ সনের ১২ নং আইন);
- (ঝ) “লাইফ বীমাকারী” অর্থ লাইফ ইস্যুরেন্স ব্যবসায়রত কোন বীমাকারী।

(২) এই প্রবিধানমালায় ব্যবহৃত যে সকল শব্দ বা অভিব্যক্তির সংজ্ঞা **প্রদান করা** হয় নাই, সেই সকল শব্দ বা অভিব্যক্তি বীমা আইন এবং বীমা উন্নয়ন ও নিয়ন্ত্রণ কর্তৃপক্ষ আইনে যে অর্থে ব্যবহৃত হইয়াছে সেই অর্থে প্রযোজ্য হইবে।

৩। তহবিল গঠন ও পরিচালনা।—(১) লাইফ ইস্যুরেন্স গ্রাহক নিরাপত্তা তহবিল নামে কর্তৃপক্ষের একটি তহবিল থাকিবে।

(২) প্রবিধান ৪ এর অধীন লাইফ বীমাকারীদের নিকট হইতে আদায়কৃত লেভি তহবিলে জমা হইবে।

(৩) তহবিলের অর্থ কোন তফসিলি ব্যাংকে কর্তৃপক্ষের নামে জমা হইবে এবং উহা নির্দিষ্ট ব্যাংক হিসাব নম্বরের মাধ্যমে আহরিত ও ব্যয়িত হইবে।

(৪) কর্তৃপক্ষ কর্তৃক নির্ধারিত দুইজন ব্যক্তির যৌথ স্বাক্ষরে তহবিলের ব্যাংক হিসাব পরিচালিত হইবে।

ব্যাখ্যা।—এই প্রবিধানের উদ্দেশ্য পূরণকল্পে “তফসিলি ব্যাংক” অর্থ Bangladesh Bank Order, 1972 (P.O. 127 of 1972) এর Article 2(j) তে সংজ্ঞায়িত কোন “Scheduled Bank”।

৪। লাইফ বীমাকারীর নিকট হইতে আদায়যোগ্য লেভি।—(১) কর্তৃপক্ষ, সরকারের সহিত আলোচনাক্রমে, লাইফ বীমাকারীর উপর লেভির হার ধার্য এবং প্রয়োজনে, সময় সময়, উহা পরিবর্তন করিতে পারিবে।

(২) লাইফ বীমাকারীর প্রথম বর্ষ প্রিমিয়ামের উপর লেভি ধার্য হইবে এবং প্রদেয় লেভি পরবর্তী বৎসরের ৩০ জুন এর মধ্যে এককালীন বা কিস্তিতে পরিশোধ করিতে হইবে :

তবে শর্ত থাকে যে, কোন লাইফ বীমাকারীর আবেদনের প্রেক্ষিতে কর্তৃপক্ষ লেভি পরিশোধের সময়সীমা সর্বোচ্চ ৩(তিন) মাস পর্যন্ত বর্ধিত করিতে পারিবে।

(৩) উপ-প্রবিধান (২) এর অধীন পরিশোধযোগ্য লেভি নির্ধারিত সময়ে পরিশোধিত না হইলে কর্তৃপক্ষ বীমা আইনের অধীন যথাযথ ব্যবস্থা গ্রহণ করিতে পারিবে।

(৪) কোন লাইফ বীমাকারীর নিবন্ধন স্থগিত বা বাতিল হইলে উক্ত নিবন্ধন স্থগিত বা বাতিল হইবার পূর্বমুহূর্ত পর্যন্ত তদ্ব্যবস্থাপক কর্তৃক প্রিমিয়ামের উপর লেভি পরিশোধ করিতে হইবে।

৫। **লেভি আদায়ে বিরতি।**—কর্তৃপক্ষ, তহবিলে পর্যাপ্ত অর্থ রহিয়াছে মর্মে সন্তুষ্ট হইলে, লেভি আদায় হইতে বিরত থাকিতে পারিবে :

তবে শর্ত থাকে যে, প্রবিধান ৬ এর উদ্দেশ্য পূরণকল্পে, কোন পরিস্থিতির কারণে আবশ্যিক প্রতীয়মান হইলে কর্তৃপক্ষ, সরকারের সহিত আলোচনাক্রমে, পুনরায় লেভি আদায় শুরু করিতে পারিবে।

৬। **তহবিল ব্যবহার।**—কর্তৃপক্ষ, প্রবিধান ৮ এর বিধান সাপেক্ষে, নিম্নবর্ণিত উদ্দেশ্যে তহবিলের অর্থ ব্যবহার করিতে পারিবে, যথা :—

- (ক) তহবিল পরিচালনা সম্পর্কিত প্রশাসনিক, আইনি এবং রক্ষণাবেক্ষণ সংক্রান্ত ব্যয়;
- (খ) দেউলিয়া বীমাকারীর পলিসি গ্রাহকের পলিসি চুক্তি অনুযায়ী দায় পরিশোধ;
- (গ) অবসায়ক কর্তৃক অবসায়িত কোন লাইফ বীমাকারীর পলিসি গ্রাহক বা অধিকারভোগীর নির্ধারিত দাবি পরিশোধের পর অবশিষ্ট অংশ বা উহার অংশ বিশেষের দাবি পরিশোধ।

৭। **তহবিল ব্যবহারে বিধি-নিষেধ।**—(১) কর্তৃপক্ষ, উহার বিবেচনায়, নির্দিষ্ট কোন শ্রেণির বীমা ব্যবসায়ের ক্ষেত্রে তহবিল ব্যবহারে বিধি-নিষেধ আরোপ করিতে পারিবে।

(২) উপ-প্রবিধান (১) এর বিধানাবলি সত্ত্বেও, দেউলিয়া বীমাকারীর ব্যবস্থাপক, পরিচালক, নিয়ন্ত্রক, সহযোগী বা অধীনস্থ কর্পোরেট সংস্থার সহযোগীর নিকট উক্ত দেউলিয়া বীমাকারীর কোন দায়, যদি থাকে, তহবিল হইতে পরিশোধ করা যাইবে না।

৮। **তহবিল হইতে অর্থ প্রাপ্তির আবেদন।**—(১) দেউলিয়া বীমাকারীর পলিসি গ্রাহক বা অধিকারভোগী কর্তৃক, কোম্পানীর অবসায়কের নিকট, পলিসি চুক্তি অনুযায়ী দাবী উত্থাপন করিতে হইবে।

(২) বীমা আইনের ধারা ১০৬ ও ১০৭ এর বিধান মোতাবেক দায় নিরূপিত ও পরিশোধিত হইবার পরবর্তী ৬(ছয়) মাস বা কর্তৃপক্ষ কর্তৃক বিজ্ঞপিত সময়ের মধ্যে অবসায়িত লাইফ বীমাকারীর পলিসি গ্রাহক বা অধিকারভোগী উক্ত তহবিল হইতে ক্ষতিপূরণ প্রাপ্তির জন্য আবেদন করিতে পারিবেন।

(৩) অবসায়িত কোন লাইফ বীমাকারীর সহিত পলিসি গ্রাহকের পলিসি চুক্তি অনুযায়ী অবসায়ক কর্তৃক দাবি আংশিক পরিশোধিত হইলে, উক্তরূপ পরিশোধিত অংশ ব্যতিরেকে অবশিষ্ট অংশের জন্য অবসায়ক কর্তৃক দাবী নিরূপিত ও পরিশোধিত হইবার পরবর্তী ৬(ছয়) মাস বা কর্তৃপক্ষ কর্তৃক বিজ্ঞাপিত সময়ের মধ্যে, অবসায়িত লাইফ বীমাকারীর পলিসি গ্রাহক বা অধিকারভোগীগণ উক্ত তহবিল হইতে ক্ষতিপূরণ প্রাপ্তির জন্য আবেদন করিতে পারিবেন।

(৪) উপ-প্রবিধান (২) ও (৩) এর অধীন ক্ষতিপূরণের দাবি পেশের জন্য পলিসি গ্রাহক বা অধিকারভোগীকে তফসিলে বর্ণিত ফরম অনুযায়ী কর্তৃপক্ষের নিকট আবেদন করিতে হইবে।

৯। পরিশোধযোগ্য দাবির পরিমাণ নির্ধারণ।—দেউলিয়া বা অবসায়িত লাইফ বীমাকারীর পলিসি গ্রাহক বা অধিকারভোগীদের দাবির ক্ষেত্রে, প্রবিধান ৮ এর অধীন অবসায়ক কর্তৃক নির্ধারিত দাবি পরিশোধের পর অবশিষ্ট দাবির বিষয়ে, কমিটি তহবিলের পরিমাণ বিবেচনাপূর্বক পরিশোধযোগ্য দাবির পরিমাণ নির্ধারণ করিবে।

১০। দাবী পরিশোধ।—(১) এই প্রবিধানমালার বিধান সাপেক্ষে, দেউলিয়া বীমাকারীর অবসায়ন আদেশ কার্যকর হইবার পর, কমিটি তহবিল হইতে দাবী পরিশোধ করিতে পারিবে।

(২) কমিটি, পলিসি গ্রাহক বা অধিকারভোগীর আবেদন প্রাপ্তির ১(এক) বৎসরের মধ্যে, দাবি পরিশোধ বা আবেদন নিষ্পত্তির যথাযথ ব্যবস্থা গ্রহণ করিবে।

(৩) পলিসি গ্রাহক বা অধিকারভোগীর দাবির পরিমাণের চাইতে তহবিলের পরিমাণ অপরিপূর্ণ হইলে, কর্তৃপক্ষ, তহবিল হইতে কিস্তিতে দাবি পরিশোধ করিতে পারিবে বা দাবি পরিশোধের জন্য পর্যাপ্ত তহবিল প্রাপ্তি সাপেক্ষে দাবি পরিশোধে বিলম্ব করিতে পারিবে।

১১। কমিটি গঠন।—(১) কর্তৃপক্ষ, এই প্রবিধানমালার উদ্দেশ্য পূরণকল্পে, নিম্নবর্ণিত সদস্য সমন্বয়ে লাইফ ইন্স্যুরেন্স গ্রাহক নিরাপত্তা তহবিল পরিচালনা কমিটি নামে একটি কমিটি গঠন করিবে, যথা :—

- (ক) কর্তৃপক্ষের চেয়ারম্যান, যিনি ইহার সভাপতিও হইবেন;
- (খ) সরকার কর্তৃক মনোনীত অন্যান্য যুগ্ম-সচিব পদমর্যাদার একজন কর্মকর্তা;
- (গ) জীবন বীমা কর্পোরেশনের ব্যবস্থাপনা পরিচালক;
- (ঘ) বাংলাদেশ বীমা এসোসিয়েশন কর্তৃক মনোনীত লাইফ ইন্স্যুরেন্স সেক্টরের ২(দুই) জন প্রতিনিধি;
- (ঙ) ইনস্টিটিউট অব চার্টার্ড অ্যাকাউন্টেন্টস অব বাংলাদেশ (আইসিএবি) কর্তৃক মনোনীত ১(এক) জন চার্টার্ড অ্যাকাউন্টেন্ট;
- (চ) কর্তৃপক্ষ কর্তৃক মনোনীত ১(এক) জন প্রতিনিধি, যিনি ইহার সদস্য-সচিবও হইবেন।

(২) কমিটির কার্য পরিচালনার সুবিধার্থে, কর্তৃপক্ষ, কমিটিকে প্রয়োজনীয় জনবলসহ সাচিবিক সহায়তা প্রদান করিবে।

(৩) কমিটি প্রয়োজনীয়তার নিরিখে, সময় সময়, উহার সভায় মিলিত হইবে।

(৪) সভাপতি কর্তৃক নির্ধারিত স্থান, তারিখ ও সময়ে সভা অনুষ্ঠিত হইবে।

(৫) অন্যান্য ৩(তিন) জন সদস্যের উপস্থিতিতে কমিটির সভার কোরাম হইবে।

(৬) সভায় উপস্থিত সদস্যদের সংখ্যাগরিষ্ঠ ভোটে কমিটির সভার সিদ্ধান্ত গৃহীত হইবে এবং ভোটের সমতার ক্ষেত্রে সভাপতির দ্বিতীয় বা নির্ণায়ক ভোট প্রদানের ক্ষমতা থাকিবে।

(৭) সরকারের পূর্বানুমোদনক্রমে কর্তৃপক্ষের চেয়ারম্যান এবং কর্তৃপক্ষ কর্তৃক মনোনীত সদস্য ব্যতীত কমিটির অন্যান্য সদস্যগণ সভায় উপস্থিতির জন্য কর্তৃপক্ষ কর্তৃক নির্দিষ্টকৃত হারে সম্মানী প্রাপ্য হইবেন।

(৮) কমিটি স্বয়ং উহার সভার কার্যপদ্ধতি নির্ধারণ করিবে।

১২। হিসাব ও নিরীক্ষা।—(১) কর্তৃপক্ষ যথাযথভাবে তহবিলের হিসাব রক্ষণ করিবে এবং হিসাবের বার্ষিক বিবরণী প্রস্তুতপূর্বক উহার অনুলিপি সরকারের নিকট প্রেরণ করিবে।

(২) বীমা কর্তৃপক্ষ আইনের ধারা ১৯ এর বিধান অনুযায়ী তহবিলের হিসাব নিরীক্ষিত হইবে।

তফসিল

[প্রবিধান ৮(৪) দ্রষ্টব্য]

আবেদন ফরম

(www.idra.org.bd ওয়েব সাইট থেকে ডাউনলোড করা যাইবে।)

বরাবর

চেয়ারম্যান, বীমা উন্নয়ন ও নিয়ন্ত্রণ কর্তৃপক্ষ

এবং

সভাপতি, লাইফ ইন্স্যুরেন্স গ্রাহক নিরাপত্তা তহবিল পরিচালনা কমিটি

সাধারণ বীমা টাওয়ার (৯ম তলা)

৩৭/এ, দিলকুশা বা/এ, ঢাকা-১০০০।

১। আবেদনকারীর নামঃ

২। পলিসি গ্রাহকের নামঃ

৩। বর্তমান ঠিকানাঃ

৪। স্থায়ী ঠিকানাঃ

৫। জাতীয় পরিচয়পত্র নম্বরঃ

৬। (ক) মোবাইল নম্বরঃ

(খ) ই-মেইল ও ফ্যাক্স (যদি থাকে)ঃ

৭। ব্যাংকের নাম ও হিসাব নম্বরঃ

৮। বীমা কোম্পানীর নামঃ

৯। পলিসি নম্বরঃ

১০। পলিসি শুরুর তারিখঃ

১১। পলিসি পরিকল্প ও মেয়াদঃ

১২। বীমার অংকঃ

১৩। বার্ষিক প্রিমিয়ামের পরিমাণঃ

১৪। কত তারিখ পর্যন্ত প্রিমিয়াম পরিশোধ করা হইয়াছেঃ

১৫। অবসায়ক কর্তৃক প্রদত্ত অর্থের পরিমাণঃ

তারিখঃ.....

(আবেদনকারীর স্বাক্ষর)

[বিঃদ্রঃ- আবেদনে বর্ণিত তথ্যের স্বপক্ষে আবেদনের সহিত যথাযথ দালিলিক প্রমাণ দাখিল করিতে হইবে।]

কর্তৃপক্ষের আদেশক্রমে,

এম. শেফাক আহমেদ, একচুয়ারি

চেয়ারম্যান

বীমা উন্নয়ন ও নিয়ন্ত্রণ কর্তৃপক্ষ

মোঃ আব্দুল মালেক, উপপরিচালক, বাংলাদেশ সরকারী মুদ্রণালয়, তেজগাঁও, ঢাকা কর্তৃক মুদ্রিত।

মোঃ আলমগীর হোসেন, উপপরিচালক, বাংলাদেশ ফরম ও প্রকাশনা অফিস,

তেজগাঁও, ঢাকা কর্তৃক প্রকাশিত। website : www.bgpress.gov.bd